



GIUSEPPE CABIZZOSU

BIBLIOTECA

www.giuseppcabizzosu.it

Giuseppe Coronas

(Torpè 1907 - 1984)

Poesie scelte in lingua sarda



GIUSEPPE CABIZZOSU

BIBLIOTECA

www.giuseppcabizzosu.it

Giuseppe Coronas

(Torpè 1907 – 1984)

Poesie scelte
in lingua sarda



GIUSEPPE CABIZZOSU

BIBLIOTECA

www.giuseppecabizzosu.it

Giuseppe Coronas

(Torpè 1907 – 1984)

Nato a Torpè il 30 gennaio 1907 e morto nel medesimo centro il 6 maggio 1984. Di famiglia agiata frequentò il Liceo Classico di Nuoro; Peppino, come venne chiamato, non poté proseguire gli studi a causa di una grave malattia agli occhi. Si impegnò attivamente nella Azione Cattolica di Torpè e nel sociale religioso. Storico e profondo conoscitore della sua terra e dell'alta Baronia fu molto religioso. La sfera religiosa ebbe una importanza fondamentale nella sua poetica e ne condizionò profondamente la produzione poetica.

A bidda Padre Luca (Mutu)

A bidda Padre Luca
beniat donzi jerru
su poeta 'e Patada.

A bidda Padre Luca
Anima isventurada
framaridas d'inferru
t'essin solu da 'uca.

A Bustianu Satta de Nuoro

(cuartina)

Niune mi preubit d'olvidare
cosas chi dolen sì a s'almu meu,
niune mi preubit de pensare
a cosas chi dan calmu recreu.

Pesso chi medas boltas Bustianu
de Sardigna su vate, su poeta,
misteros sì de ogni coro umanu
a su diletu Monte pro sa meta

de sos matessi sardos chi devotos
aman peregrinantes cussighire
si siat jitu puru chie sos votos
arcanos de un'alma a los ischire.

Si siat jitu sì non pro mirare
dae cussas alturas su Tirrenu,
Corrasi, Gennargentu e Gonare,
Mont'Albu e sitos in logu amenu.

'Iddas de sa Barbagia e Baronia
nè pro deliziaresi ancora
de Nuoro citade sua nadia
chin sos incantos suos intro e fora.

Peri sas 'addes amenas, dulches litos,
non pro faghere incontru chin sas janas,
chin gigantes o ninfas in funtanas
mes'eligas, chercos e granitos.

Non pro lograre no su sol'incantu
de sos fadados buscos, sos ristoros
de cristallinas abbas, fra tesoros
profusos de natura inie tantu.

Fieru e forte in s'umanu andare
de Barbagia leone veraderu
a s'Ortobene teneru e sinzeru
lu pesso alzadu sì pro visitare

s'almu vitoriosu chi est inie
in artisticu brunzu efigiadu,
su chi in su monte 'e Solima una die
a sa perfida morte morte at dadu.

Est dulce Galileu chi apat nadu
"comente una 'ia si torrere!
cantu m'est pena, cantu su non credere
chi su Verbu ses Tue e umanadu"

"Dae sa morte ses risussitadu
arbitru de sa vida Unicu Mere,
Jesus triunfadore si potere
fra sos tuos a essere contadu"

"E cale prus gloriosu istendarte
ch'as in manos e mustras solu Tue,
oh! si jeo e zente de totue
poteremus in Issu fagher parte".

"De sos ch'a Tie sighin totu est cue:
libertade, justissia, amore e paghe,
non si chirchene no in aterue.
O Cristos Redentore pro me faghe
chi m'iscraessat tanta trista nue".

A don Diego Calvisi

(sonete)

Non giacintu, rosa, nè amarantu
d'isplendidu jardinu canto e onoro.
Non su diamante, sa prata nè i s'oro,
eo de laudes digno e nè de vantu.

Su bene magnificu almu tesoro
ch'est dicia suprema e divu incantu
o Don Calvisi chi amamus tantu
de s'Eclesia Santa altu decoro.

Senza mai afannos, senza pena,
felicemente passet custa vida
fin'a sos chentu de dulcuras piena.

De milli e milli benes fiorida,
suave, bella, in Cristos serena,
de pannos nobilissimos bestida.

A nostra signora

(sonete)

Mama de tou Babbu ses signora
Fiza de tou Fizu, Virgo Amante,
finas ecelsos che Petrarca e Dante
cantende a Tie fallidu an ancora.

Tue simile ses a s'aurora
astru non b'at de Te pius brillante
Ghia ses Tue de donzi errante
de Chelu e de terra Imperadora.

Maria senza macula cunzeta
de sa Triade Santa almu tesoro
in Te at summu gradu 'ogni Virtude.

O balsamu de 'ogni amaritude
o de su Paradisu iscala d'oro
de s'istirpe de David rosa eleta.

A s'istudente Juanne Carrone

(mortu in dun'incidente istradale su 28/03/1961)

(cuartina)

Non rosa, non gravegliu, nè amarantu,
non lizu, non giacintu e nè viola,
sos cumpanzos ch'aias in iscola
benin a ti 'atire in campusantu.

Non su laru, su tassu, nè i su pinu,
ti 'enin a deponnere in sa losa,
una ghirlanda t'ofrin preziosa
ma non de transitoriu destinu.

Fata est totu de dulches ammentos
e d'ammiraciones verdaderas,
adornada de lagrimas sinzeras,
d'amorosos, unanimes acentos.

Rezzi e agradeschi custu donu
cale immarcescibile presente
da ue godis fra s'eleta zente
in s'Empireu, o cumpanzu 'onu.

A su carissimu don Rosariu Menne

(sonete)

Pustis de unu lustru ch'as passadu
tenzende de Torpè solerte cura,
Pastore dae totu veneradu,
pienu de costanza e de premura.

Nobile sacerdote as olobradu
oje plus insigne investidura,
pro sa cale risultas collocadu
de sa "Regina nivis" in s'altura.

O Canonigu Menne unu saludu
rezzi in cust'ora afetuosu tantu
cun s'auguriu prus bellu e devotu.

Maria ti cuncedat 'ogni azudu
e in su ministeru tou santu
donet a tie su chi bramas totu.

A su mussegnore piscamu de Nuoro chi ghirat dae su conciliu

(cuartina)

Veneradu Pastore dignu e bonu
cordiale ti damus sa benennida
mirend'oe pius eleta e isplendida
sa tua figura, pustis tantu donu,

In Conciliu, d'altos tuos talentos;
bene custu elargidu a tie
dae s'alma Reina de su nie
in asi tant'istoricos momentos.

Issa, dulce Patrona de Nuoro,
de sas Grassias puru titulada
coment'in Roma favoridu t'ada
totu como ti det su ch'as in coro.

Pro chi de Cristos si alzet totue
in signu de Vitoria s'Istendarte
in Sardigna, in Italia, in donzi parte
a cumprimentu 'e su chi pregas tue.

Ajò prestu ischida (Mutu)

Ajò prestu ischida
pesa Eleonora
a tantu mannu male
pro cust'Isula tua
fortemente t'impigna.

Ajò prestu ischida
Non rinaschit Sardigna
sende sa menzus sua
zoventude galu fora,
cal'est su corpus, cale
chi senz'anima at vida?

Antonia Mesina (Mutu)

Antonia Mesina
ite 'antu, ite gloria
pro sos sardos de Pio.

Antonia Mesina
In su coro m'iscrio
"morrer s'ì ma vittoria
che i sa barbaricina".

Bellos pregios tantos

(Mutu)

Bellos pregios tantos
nos dat sa puridade
in cust'adde afannosa.

Bellos pregios tantos
Oh, cantu s'umiltade
virtude est preziosa
issa faghet sos santos.

Chin tres de 'Uddusò (Mutu)

Chin tres de 'Uddusò
dottor Pala partidu
est 'eris a Nuoro.

Chin tres de 'Uddusò
Cantu bellu est su coro
chi sinzeru e lughidu
nat su sì o su no.

Clorinda e Berenice (Mutu)

Clorinda e Berenice
Orazio e Tigellu
in Roma son pintende
artistas de Turchia.

Clorinda e Berenice
Naschidu est su Messia
in Chelu son cantende
su bambineddu bellu
o Betelem felice.

Coronadu de gloria (Mutu)

Coronadu de gloria
de sas prus luminosas
su Generale Francu
benzat a s'annu nou
in s'Italia bella.

Coronadu de gloria
Altissima donzella
su sembiante tou
cheret postu a fiancu
de sas pius donosas
chi registrat s'istoria.

Costa Ermosa

(sonete)

Costa Ermosa, rica s` d'istoria,
de vetustos ammentos adornada,
chin magnificos versos celebrada
dae poetas che Farsiliu e Inoria.

A probe de su colle ue Posada
galu s'onorat de s'antiga gloria...
dae Tolomeo, si at memoria
chi fit Feronia illustre situada.

Sardos e istranzos totu ajone
a bos deliziare peri custos
mirabbiles, preclaros, almos sitos,

laudes a dare chin rejone
a s'autore de 'asi venustos
cuadros de natura e infinitos,

cantarel'innos de benissione
chin versos santos adatos e justos
comente veramente nde at meritos.

Costa Feronia

(sonete)

Est in sa sarda parte levantina
Costa Feronia delissiosa sì
fra sa dulce Ismeralda che reina
ei su totu incantu 'e Tortolì.

S'idea bellicosa a lì per lì
de Grecia, de Iberia o Saracina
alguna pius non b'at vela chi
undas profanen sa sua marina.

Ninfas, sirenas, fra sas rocas sunu
de su Tirrenu mare in custu zona
rica d'istoria e d'arcanos piena.

Nde godan sos ristoros in comunu
principes ch'an in testa una corona,
umiles chi si paschen solu 'e pena.

Costa Ulisse

(sonete)

Est dulce, ispeziosa e peregrina,
Costa Ulisse tra Budoni e Oro-
sei, a sa parte levantina
de s'isula a sa cale dat decoro.

Deliziante s'ì anima e coro
sa sua incomparabile marina,
zona tiniscolesu e pasadina
de s'Alta Baronia almu tesoro.

Si cree chi Ulisse cue unu lontanu
tempus mirende logu tantu amenu
neidi a sos suos ue incontrare

'asi biaitu e isplendente mare
den che i custu tratu 'e su Tirrenu
Grecu, Feniciu, Ispanicu o Romanu

ch'isperat unu cras, calmu e serenu,
d'esser de custa zona Esser Sovranu.

Dae Torpè a Luras (Mutu)

Dae Torpè a Luras
dottor Ruju est partidu
ca nanchi est arrivada
sa nostra imperatrice.

Dae Torpè a Luras
Onesta e preziada
mi pares Beatrice
sa chi Dante at bidu
in Celestes luguras.

David, Rachele, Abramo
(Mutu)

David, Rachele, Abramo
los at pintos in Bosa
su professor Derios.

David, Rachele, Abramo
Bazi suspiros mios
bazi e nade a Donosa
ch'immensamente l'amo.

De preziosas sedas
(Mutu)

De preziosas sedas
chi usan sas Torpinas
est costumene insoro.

De preziosas sedas
Cussenzias meschinas
non lu brutades s'oro
pro chi tantu gherredas.

Din, don, dan
(Mutu)

Din, don, dan,
sonat sa campanedda
cando tocan s'iscola

Din, don, dan,
O Virgine consola
custa trista orfanedda
chei s'isposa 'e Can.

Eo so sardu e i sa Patria istimo

Eo so sardu e i sa Patria istimo
narait frade meu in sa trincera,
promore sua sa morte non timo
cant'orrorosa siat e fiera,
de su menzus tesoro eo arrimo
pro sa Patria mea verdadera
e pro s'amore chi no ismentigat mai
"chi per la Patria muor vissuto è assai"

Feminas de Tonara (Mutu)

Feminas de Tonara
giran peri Sardigna
sos turrone bendende
de nughe e de nunzola.

Feminas de Tonara
In s'istanzia sola
cando t'ido cosende
modesta e benigna
ti assimizo a Sara.

Fizos de Roma faghene ausentu

Fizos de Roma faghene ausentu
a pes de Monte Nurres chi in antigu
fit Monte Linnas Brunas jamadu,
faghen jardinos chin raru talentu
piantan binzas e semenan trigu
sa 'idda 'e Torpè ana fundadu
in costas d'Ichnusa a su levante
de s'illustre Feronia bighinante.

In dulce sardu litu (Mutu)

In dulce sardu litu
pitorescu est Nuoro
a pes de s'Ortobene.

In dulce sardu litu
tenzedas salute e bene
paghe, amore e decoro
e meritu infinitu.

In dun'adde apo 'idu (Mutu)

In dun'adde apo 'idu
de Persia sas fadas
ricamende a oro,
a seda e arghentu
unu mantu de grana
d'orientale usu.

In dun'adde apo 'idu
Pius de chentu ispadas
in coro mi an fichidu.

De Persia sas fadas
In coro mi an fichidu
pius de chentu ispadas.

Ricamende a oro
Pius de chentu ispadas
fichidu m'an in coro.

A seda e arghentu
Fichidu m'an in coro
ispadas prus de chentu.

Unu mantu de grana
Ispadas prus de chentu
fichidu in coro m'ana.

D'orientale usu
Fichidu in coro m'ana
de chentu ispadas prusu.

In s'adde fiorida (Mutu)

In s'adde fiorida
cantat sa pastorella
cuddu mutu chi nada:
"su puzoneddu d'oro
ch'in gabbia tenia
partidu nd'est lontanu
a terras furisteras".

In s'adde fiorida
Paraulas sinzeras
sena mai arcanu
dami solu ebbia
dimustrami su coro
o bellissima fada
o Clori tantu bella
palma d'oro dechida.

Logudoro

(sonete)

Istanote ap'intesu Logudoro
chi fit sa 'idda mea visitende,
non violinos, ne chitarras d'oro
jighiat e ne mandolas sonende.

S'alma gentile, su nobile coro
de Ichnusa bella fit mustrende,
nende: in altu, in alt'o Nuoro
o Tatari, o Casteddu, ite pensende

sezis in custu tempus de dolore
in custos annos de disdicia pienes,
ajò fieru sa fronte drizzade!

Amade in Cristos, fortemente amade
si diventare cherides amenos
jardinos pro s'italicu onore.

Maria ses ispada (Mutu)

Maria ses ispada
palma vitoriosa
istendardu e corona

Maria ses ispada
Virgine tantu 'ona
cust'anima afannosa
pro Te siat salvada.

Maria ses s'istella
(Mutu)

Maria ses s'istella,
Maria ses sa nae,
Maria ses su portu.

Maria ses s'istella
Donz'anima at cunfortu
de su Chelu ses jae
o pura Verginella.

Nara it'est amore anim'amante
(Mutu)

Nara it'est amore anim'amante
anim'amante nara it'est amore
it'est amore anim'amante nara

Nara it'est amore anim'amante
Jeo creo chi siat su chi cara
rendet sa vida in donzi dolore
ca de issu nd'est s'unicu calmante.

Note bella de austu (Mutu)

Note bella de austu
sas undighi non dromo
s'intenden in carrera
cantos bellos d'amore
d'onestos e donosos
zovanos de 'idda mia.

Note bella de austu
Comente a Tobia
faghidebos isposos
chin femina d'onore
massaja verdadera
su pensarebi como
est bellu, santu e justu.

Numen d'eterna dura (Mutu)

Numen d'eterna dura
de altissima gloria
"principe Amedeo"
chi in Africa nd'est mortu.

Numen d'eterna dura
Su Signore risortu
comente bramo eo
semper bos det vitoria
paghe, paghe e dulcura.

Oje pinto a Mosè (Mutu)

Oje pinto a Mosè
Dante chin Beatrice,
Elena s'ispartana,
Pomponia Grecina.

Oje pinto a Mosè
Gentile signorina
ottimamente sana
cuntenta e felice
torret prestu a Torpè.

Pastores de Limbara (Mutu)

Pastores de Limbara
partin a s'Inghilterra
in su mese 'e austu.

Pastores de Limbara
S'omine bonu e justu
det bincher cada gherra
sa prus cruda e amara.

Perfugas e Ploaghe (Mutu)

Perfugas e Ploaghe
Zaramonte e Laerru
sono 'iddas de Anglona.

Perfugas e Ploaghe
Cumbinchemas s'inferru
chin d'una vida 'ona
de amore e de paghe.

Pro Giovanninu Fenu

(sonete)

Sa dipartida tua pensaia
esser de tempus meda pius lontana
cand'invezzes ispintu sì d'arcana,
nobile, forte e manna bramosia.

Ti tucas a su monte d'Oliana
solu sena niunu in cumpanzia
in circa no d'incognita funtana
o d'ervas raras ch'at Corراسي ebbia.

Andas Giovanninu, d'ardimentu
pienu, alta chimas pro lograre,
fra misterios puru in s'intentu,

d'antros fadados suos penetrare
un'anzelu però, almu momentu,
fit cue menzus logos a ti dare.

Pro sa fine de su conciliu

(sonete)

Sessantachimbe s'oto de nadale
serrat su Conciliu a gloria e bantu
de s'Eclesia Vera, in totue
ofrin a sa "Pura e senza manza"

Pius festosos innos d'alabanza
fra de raros incensos alma nue.
Esultat oe su mundu totucantu
Ocasu e Oriente tale e cale.

O mama de s'Eternu ispeciosa
ghia perfeta sa pius sigura,
nois prodigos fizo incamina

a s'eleta Sionne, sa divina,
suprema, deliziente, sacra altura
ue totus t'aclaman "Vitoriosa".

(1965)

Pro sa visita pastorale de su piscamu de Nuoro a Torpè

(sonete)

Eco sete de maju grande data
in su sessanta milli e noighentos,
s'Ecellente Amabile Pastore
pro sa sacra visita est arrivadu.

Su pius filiale benennidu
Torpè li gridat chin immensu amore,
chin dulches, inefabiles acentos
ch'aleni pius de s'oro e de sa prata.

Oh, Supremu Ispiritu, sae tres
de sa Trina Essenzia persona,
a s'apostolu dignu nos mantene

fideles pro lograre cuddu bene
chi dat immarcescibile corona
ue chin Babbu e Fizu Tue ses.

Pro sa zovventura

(sonete)

Eco como su tempus de amare
zovanu de vint'annos crèe a mie
eco como su tempus de pensare
a s'eleta Rachele chi unu die
orgogliosu des jughere a s'altare
dechida rosa, candida che nie,
eleta totalmente a profumare
su caminu 'e sa vida solu a tie.

Zovanu onestu chi pares beranu
cun totu sas dulcuras e fiores
de Deus su cunsizu invoca tantu

pro chi a tie cunzedat intantu
femina 'ona de altos onores
digna d'amore immensu e sovrumanu.

Pro sas teracas sardas in Roma in su cunvegnu Aclista

(sonete)

In custa occasione, sorres caras
ite bos at a narrer su meu coro?
E ite a bois chi tantu onoro
esprimer dene totu custas laras?

Che in su firmamentu istellas jaras
siedas in sa fama, in su decoro,
ricas de onestade, almu tesoro,
sa menzus perla fra sas perlas raras.

Umiles fizas de sa sarda terra
umbe dignu tenzeit naschimentu
sa grande d'Arborea Eleonora,

in sa citade eterna bois ancora
acesa cunservade 'ogni momentu
sa Fide triunfadora de 'ogni gherra..

Augurios bellos, novidades bonas,
saludos tantos, Pepinu Coronas.

Rafaellu chin Dante (Mutu)

Rafaellu chin Dante
Colombo e Galileu
sono astros potentes
ch'illuminan s'istoria
de lughe portentosa.

Rafaellu chin Dante
Zovana virtudosa
dadu t'aian gloria
si esseren viventes
Pindaru chin Alceu
Prassitele e Timante.

Rosa e rosignolu (Mutu)

Rosa e rosignolu
non si poden cuare
ca su bellu profumu
chin s'armonicu cantu
los traighet continu.

Rosa e rosignolu
Narat santu Austinu
chi sa vida est piantu
e donzi bene est fumu
si non pensas chircare
de Cristos su consolu.

Sa mama 'e sa reina (Mutu)

Sa mama 'e sa reina
si narat Milena
e i su babbu Nigola.

Sa mama 'e sa reina
O Virgine consola
in tanta cruda pena
cust'anima mischina.

Sa Santa de Siena (Mutu)

Sa Santa de Siena
est grande italiana
la pinghet in Nuoro
unu pizzinnu ebreu.

Sa Santa de Siena
Signore Deus meu
m'an trafitu su coro
chi est chi mi lu sanat
si tue non nde as pena?

Sas fadas d'Ennargentu (Mutu)

Sas fadas d'Ennargentu
tucan in carru d'oro
a sos amenos litos
de su sacru Ortobene
ca den tessere inie
pro sas pizzinnas bellas
chi Torpè dat isposas
Su pannu: s'Onestade
Su brocadu: s'Onore
Sa seda: s'Alta Fama.

Sas fadas d'Ennargentu
Nobilissima dama
s'unica chi s'amore
jameit "Majestade"
sas olezzantes rosas
sas fulgentes istellas
riverin solu a tie,
tue de raru bene,
teneros, infinitos
palpitos a su coro
mi das e de cuntentu.

So sardu ma non so barbaricinu

So sardu ma non so barbaricinu,
nemancu de Gaddura e Logudoro,
non so campidanesu, nè ozastrinu,
ma sa provincia mea nd'est Nuoro;
de pianura so non muntagninu,
d'esser aculzu a mare anzis m'onoro,
iscas però chi non so planalzesu,
eo so veramente baroniesu.

Apartenzo a s'Alta Baronia,
cudda chi a Posada fit sugeta
cando zente d'Ispagna e de Turchia
fin d'Ichnusa flagellu e mineta,
inue de s'antiga Feronia
formein puru ruina cumpleta
cando chin sarachenos e piusu
fin de s'Isula nostra tristu abbusu.

Apuntu pro una simple cognizione
de Feronia chelzo ispiegare:
inumbe Torpè tenet s'istazione
cand'a Nuoro tenet de andare
o a parte d'Olbia o de Longone
precisu incue a fazza de su mare
bi fit sa muraglia e una porta
de Feronia antiga como morta.

Sos pastores de Bitti
(Mutu)

Sos pastores de Bitti
falan a Campidanu
chin sas gamas insoro.

Sos pastores de Bitti
Aceta prenda d'oro
de t'astringher sa manu
Venus bella permiti.

Su costumen d'inoghe (Mutu)

Su costumen d'inoghe
in martu e in abrule
nanchi l'an presentadu
a su Re in Verona.

Su costumen d'inoghe
A lavadora 'ona
mai preda at mancadu,
a su massaju vile
donzi zapu li noghet.

Su costumen famadu (Mutu)

Su costumen famadu
de Osilo at pintu
Ciusa in Nuoro
e Floris in Gallura
de pinghere at decisu
a don Bainzu Pes
poeta genuinu
che Limbori e Limbudu.

Su costumen famadu
Giovanu libertinu
t'alimentas de ludu,
non pensas su chi ses
chin su vigliacu risu
cres ponner in bassura
sos chi paschen d'oro
sos chi meda distintu
tenen su sambenadu.

Su crere in su destinù est un'errore

Su crere in su destinù est un'errore,
su mundu est in piena libertade,
esser galante o esser pecadore
cunsistit chin sa nostra voluntade
e pruite su Cristos de s'Amore
mort'in sa Rughe est pro s'umanidade?
Si pro destinù pecheret s'omìne
codice chin Vangelu a cale fine?

Su nobile Musio (Mutu)

Su nobile Musio
est partidu a Gallura
chin d'unu padre dotu
professore in Torinu.

Su nobile Musio
Prosighemas continu
contr'a Satana totu
senza manza 'e paura
sos soldados de Pio.

Torpè

(sonete)

Fizos de Roma faghen ausentu
a pes de monte Nurres in antigu,
piantan binzas e laoran trigu,
forman jardins chin raru talentu.

Allevan s'abe e dae cada armentu
traen, industriosos, ricu abbigu,
bestin de ulia e laru 'ogni montrigu,
fraigan e Torpè at fundamentu.

Mesu illustre e celebrada zona
chin ondra 'e vagos pitorescos litos,
in costa d'Ichnusa a su levante,

fra casteddos e turre chi corona
faghian tando subra de almos sitos
a Feronia antiga non distante.

Torpè (1)

(sonete)

In dulce, raru incantu e in decoro
d'un'illustre e istoricu passadu,
de montes e collinas circundadu
Torpè chi parte faghet a Nuoro,
est in amenu logu fra tesoro
d'addes, pianos, buscos, situadu
chin su riu a probe numenadu
Cedrisena chi bagnat iscras d'oro.

Torpè graziosu e pitorescu, chi
ispendeit che gemma in sa corona
de Castel della Fava una 'ia,
cand'e Gallura sos juighes sì
e principes d'Arborea e d'Aragona
domineini s'Alta Baronia.

L'abbitat zente laboriosa e bona
ch'aman su ben'istare e i s'allegria.

Torpè (2)

(sonete)

Torpè, simil'amante in vanu apitu
de chie prus non podet rimirare,
s'acrarat a levante 'e sardu situ
ue relughet su Tirrenu mare

d'almu, raru, splendore biaitu,
e d'epoca luntana amat sognare
su chi in Feronia, gherrieri invitu,
intrat s'Isula nostra a conchistare.

Fizu no de Cartago nè d'Atene
ma Romanu gloriosu e dighu
d'operas med'illustre e de sambene:

cuddu ch'apeit su mazore impighu
de fundare a Torpè; su chi lumene
li deit sou, nobile e insighu.

Una tiniscolesa

(Mutu)

Una tiniscolesa
jughet curitu nou
ca nanchi isposat como.

Una tiniscolesa
Sa mere 'e custa domo
a gustu e bramu sou
la 'idemas marchesa.

Unu palatu artisticu e bellu (Mutu)

Unu palatu artisticu e bellu
son fraighende a nou in sa Gaddura
duos ebreos de altu cunsizu
chin pedras jutas dae Monte Rosa
chin marmaru de Massa e Lombardia,
chin abbas de su Nilu e de Tamigi
chin alabastru de s'Iglesiente
e chin antigu doricu metallu.

Unu palatu artisticu e bellu
Si girere s'Ispagna e Portugallu,
chin sa terra Britanna, s'oriente,
s'Italia tota, Berlinu e Parigi,
s'elegante Vienna, s'Ungheria,
che a tie Columba deliziosa
non nde dia aciapare s'assimizu
ca ses una magnifica pintura
de Giotto, De Vinci, Rafaellu.

Unu pintore insignu (Mutu)

Unu pintore insignu
b'at bennidu a Nuoro
pro 'istaret inie
ca li faghen pintare
sos costumen ch'at bidu
intro de duas salas
e de pustis sa luna.
su mare chin sas costas,
unu Re senza fizu
pianghende in sa tumba.

Unu pintore insignu
Tue ses che Columba
bianca prus che lizu
chin pinnas bene postas
non tinde fartat una
fortes jughes sas alas
in altu as su nidu
non ti poden toccare
ca pro ciapare a tie
b'at un'iscala d'oro
chi b'alzat chie est dignu.

Unu tempus sa Corte (Mutu)

Unu tempus sa Corte
de s'antiga Pasada
solian visitare
Teodato e Valente
chi fin ducas famosos.

Unu tempus sa Corte
Amabbiles isposas
bos jugan dignamente
felices a s'altare
de sa data bramada
prestu nd'apedas sorte.

Viola 'e pensieru (Mutu)

Viola 'e pensieru
mi pranto in su jardinu
chin ateros fiores
de suave profumu
de vagu coloridu.

Viola 'e pensieru
Non ponzas in olvidu
chi richesa est fumu
est fumu sos onores
si chin Cristos continu
non ti tenes sinzeru.